



中興將帥別傳續編卷四

長洲朱孔彰撰

周尙書達武別傳

周公達武字夢熊號渭臣湖南甯鄉人也咸豐四年入李忠武公續賓營續賓弟勇毅公續宜見之曰將才也從征戰先登陷陳克湖北省城擢守備戰江西湖口進都司公每戰必酣飲手大旗盪決賊輒驚卻有譖之者忠武曰吾見其入陳銳非醉不及此卿等勿言明日令領信字營百人爲先鋒八年夏復麻城克黃安擢游擊戴花翎李忠武之征皖公率壯士七十八克舒城忠武進三河公以左耳受鎗傷留舒城忠武死綏舒桐守軍亦潰公以創重回湖南九年春僞翼王石大開犯湖南邊湖南防軍多出援他省腹地空虛巡撫駱公秉章別募新軍求將才公以左公宗棠劉公典薦令與王永章各領五百人屬趙兵備煥聯剿寇祁陽邵陽皆捷石酋犯寶慶公守東關拒戰三月及李勇毅至共破賊與王永章追賊文明鋪斬馘無算擢參將明年援廣西克富川平古城連塘賊壘復賀縣擢副將 詔留湖南補用加總兵銜八

月石酋中旗賊犯永明公扼新開渡大破之其後旗賊竄江東柘牌再破之論功以總兵用十月中旗後隊賊數萬出四厂橋劉按察嶽昭拒戰公赴援大捷明年石寇黨復犯靖州陷會同公擊走之寇趨斛水與席公寶田江公忠義各軍共破之寇走乾州公追之走龍山至紅巖溪鏖戰三晝夜賊敗走窺常澧與易兵備佩紳陳兵備寶箴各軍共破之同治元年粵寇別股出貴州陷湖北來鳳期與石寇合公與席公各軍敗之復來鳳 詔賞三代一品封典時湖南邊

卷四

二

境肅清公以母喪歸無何蜀亂棘駱公秉章爲四川總督奏調公八月抵涪州適寇酋周紹勇由城口竄陝西公追擊八戰而至大竹東斬馘無算禽周紹勇及僞都統吳崇禮等百六十八名檻送成都誅之十月蜀賊郭乃刀竄儀隴公敗之茯苓場斬級千餘追至鼎山鋪賊三日不食皆降禽郭乃刀及寇目二十餘人郭乃刀與周紹勇爲蜀中劇賊至是悉平 詔授公四川建昌鎮總兵官加提督銜明年夏護理四川提督時粵寇僞扶王陳德才圍漢中擁眾數十萬

昭廣門戶空虛而石大開亦由高縣走甯遠全蜀大震駱公令公增募軍領四千人往來游擊蜀中以安陝撫劉公蓉咨駱公令公離蜀援陝駱公以公軍四千人爲蜀中最勁之兵別無他軍可恃奏留專蜀防而漢中遂不守三年正月僞扶王陳得才因救金陵逆巢棄漢中東下洋縣寇僞昭武王蔡昌齡與粵寇之留漢中者僞啟王梁福成由漢中竄甘肅階州階州與蜀連公議以剽爲防客軍數十壁會戰終莫能制其死命乃隧地入階州地多沙石穴十餘處皆爲

卷四

三

水石阻最後公度將台山可直達城根復穴地道實火藥其中伏死士四百人其旁四年五月十三日地雷發城崩十餘丈四百人從灰土中躍入大軍隨之遂克階州斬昌齡福成駱公上戰狀 詔以提督記名並賞上方珍物六月公領八千人討松潘叛番其秋平之冬十二月 詔授貴州提督駱公奏留駐軍重慶防滇邊野夷明年秋剽平馬邊廳教匪會撻匪竄陝西左公宗棠咨公會勦駱公奏留防蜀邊乃令部將李輝武率三千人入陝又明年公躬領四千八

百人勦越嵩裸夷斬級數千諸夷皆降 詔賞穿黃  
馬褂九年 詔赴貴州提督任先是四川援黔之師  
凡萬餘人歷年用餼千餘萬至是川督吳公棠論罷  
其軍請公莅本任總軍旅月由四川發實餼五萬八  
千兩供軍於以重黔權紓蜀力 詔可其奏公乃率  
六千人行沿途勦平苗砦無算遂抵貴陽與巡撫曾  
公璧光議戰守增立仁義禮經文緯武等營先後召  
募逾三萬人當咸同之際 朝廷方亟東征未遑南  
顧但責四川湖南出師援黔省尺籍久虛無自主

卷四

四

之兵省城百里外卽莫能制馭公至由龍里進規凱  
渡將上下游賊截爲二旋復都勻與巡撫合疏言黔  
省上游自清鎮西達畢節游寇出沒道路梗塞盤江  
以南諸城久經回據苗夷狎黨倚之爲援每由安順  
出犯定廣則全境騷然計必以數千人由郎岱安南  
攻其左以數千人由定番歸化攻其右再以數千人  
循安順而上節節掃盪直指興義貞豐左右夾擊庶  
可得手是上游用兵以萬計也下游平越甕安爲遵  
義屏蔽地方麤定接近苗疆不可無重兵扼防而都

勻新服前有八寨巨股後有獨山麻哈之賊阻截糧  
運見撥六千人守都勻兼顧後路至前進機宜臣達  
武擬率萬四千人分爲兩軍一出獨山荔波規八寨  
一由麻哈圖凱里並檄都麻兩路防師層層進逼一  
路銜接期于尺寸之地有得必守庶能步步深入早  
會楚師則下游用兵以二三萬計也兩游賊匪多遜  
于龍貴定廣之交是必打成兩樞使不得通聲息相  
援應否則上勦下竄下擊上奔牽綴官軍終于不可  
收拾而兼辦兩游總計護運勦賊非三萬八千人不

卷四

五

可此項軍饗除川省月協銀五萬八千兩外尙須按  
月添籌銀十二萬兩庶軍皆宿飽而成功可期 詔  
從其議時羣苗據清鎮回首譚五受據永甯分黨攻  
歸化公遣將擊破之又復威甯進攻甲利拔之斬僞  
帥潘大五十年正月遣將鍾開蘭進師高木塘距麻  
哈州十里苗營山巔四圍阻水開蘭三路進軍克之  
並下螺絲牛角中山等砦平楓香樹以下二十餘堡  
粵寇李文彩受石大開僞丞相職與苗酋李高腳分  
踞都勻之平浪獨山之樓梯屯遣將何世華破之追

殺三十里焚旁砦百餘至界粵大河前後斬級八九  
千拔出男婦老幼四千餘口高腳負創遞入寨酋聞  
國興者踞山谷有年羣苗皆秉其號令自高木塘一  
戰膽落屢上書求撫又思誅不敢出適世華破李賊  
俘獲頭目七百餘詣公公以貴東大勢必先收八寨  
收八寨必先得國興遂訊羣俘誅其罪貫盈者二十  
三人餘縱使去世華愕曰出萬死弋賊奈何縱之公  
笑曰非公所知也公不見諸葛縱孟獲乎國興果因  
是與獨山圍首唐大炬皆降公責令收回八寨上下

卷四

六

江三腳自贖並許三腳抽釐稅贍其眾國興等由是  
感激立功諸將皆服時狝苗擾上游譚五受自永甯  
逸出連窺鍊索橋公遣將鍾有思羅應旒龔生環擊  
之連克堡砦二百五十一生環又擊歸化苗破砦數  
十乘勢拔尖刀山斬偽帥哈五子陳俘馘數千又別  
破威甯回酋金大五其弟金大七遞金家崗崗倚懸  
巖外列柵甚堅部將黃宗輝破之回黨匿石洞不出  
難火熏之無一脫者由是盤江以北無賊蹤李高腳  
失四寨後回凱渡再擊破之高腳跳免餘眾破散定

番獨山荔波賊亦平惟東南吳秀河外苗教互結公遣何世華克羊安唐大烜破内外套交然河俘斬數千各軍會攻吳秀河克之進攻班竹園又克之凡克夷苗教匪砦二百餘前後斬級近萬于是都勻四面皆平遂令何世華率四千人守盤江防上游各軍東下會楚軍克丹江凱里時麻哈州尙爲苗據自州城南出宣威平定東達下司河皆凶苗窟穴對岸丹江凱里接連九股生苗沿河渡口紛歧構煽熟苗眾號數萬與城苗互應五月公遣將曾紀鳳周家祐鄧千

卷四

七

勝鍾開蘭次第攻克之禽苗酋楊阿保等百二十九名降下四十餘砦州屬悉平與楚軍隔一水哨旗相望會有議湖南援黔疲于供軍請撤半軍回湘自固疆圉公力持不可 朝廷從之八寨城苗旣就撫而苗酋柳阿三包大肚龍兆祥等分踞旁砦猶出劫掠公遣聞國興唐大烜擊破之又遣將鄧有德唐天祐夾擊斬阿三兆祥平砦百數十斬級數千大肚走柞街又數十戰而克清平黃平二城破砦八十餘撫降者百七十餘砦十二月楚軍已破天星台頭黔楚兩

軍始合十一年正月公部克龍家狗頭二砦禽僞王  
潘老冒龍世昌于陳斬僞侯潘大五楊阿九等百八  
十六名時席軍已破張秀眉公分軍敗其黨羣苗奔  
平茶牛角坡眾尙二十萬公約席部由凱里會剿公  
自清平進師一鼓二砦均下斬級三萬降者倍之追  
至冷水溝賊踏死者又以萬計生禽賊酋包大肚金  
榦榦楊文開于敵及其黨劉開甲王鳳開等二十二  
名李高脚李文彩兩首竄至荆蓬坎公部三路追擊  
盡殄之平茶牛角坡之破也漏網之苗悉奔香爐山

卷四

八

山去清平城三十里拔地矗立分上中下三盤中盤  
縱廣各數里前後築卡守之上盤高出雲表瘴霧疑  
蟄居無人焉砦苗初祇萬餘後歸併日眾柵棚櫛比  
隱見巖石間各軍轟以西洋炸礮蔽于林石不能大  
勦公以賊多乏食下令圍之購砦苗吳阿撒內應軍  
分道上阿撒率降苗四路縱火各軍縱橫盪擊苗墜  
巖下如寫瀑死無算生禽凶苗二千餘降五千餘拔  
老弱數千時張秀眉金大五已爲席軍禽餘苗多公  
部所戮苗叟悉平 詔賞公騎都尉世職湖南巡撫

王公文韶繪圖獻于朝以雍正閒新關苗臺六城古州台拱清江都江丹江八寨爲楚軍所復其都勻麻哈清平黃平爲川黔軍所克川黔軍公所部也計席軍征討五年公部征討二年而後苗臺大定四月上游興義回教各匪蠢動公遣將討平之斬回酋馬斯駿五月遣將會滇軍攻普安新城賊稠林立旬月之閒傷兵士三千人部將文德勝中槍死公聞力疾馳至軍以攻堅非策下令招撫劉垂祺者故普安令代英之撫子也與公同里時在軍中張定中未叛時

卷四

九

代英遇之有恩及代英殉難垂祺閒關寇中尋父骸定中陰遣其黨護之用是垂祺得與定中習公審其事令垂祺說之降明年復叛公討平之十二年公至蜀散軍乞病歸光緒三年詔授甘肅提督回酋自白彥虎竄出關外關內番族就撫梨園番例貢馬匹歲由提督派弁點驗入陋規銀數千兩公閱窮番困敝咨請左公宗棠裁去之並請籌撥銀兩貸與各族資牧養番民感焉十年妖民王林倡亂于高臺公討平之斬王林十九年

皇太后萬壽慶典加尙書銜明年正月卒于官 詔  
建祠立傳長子家濂以一品廕生襲世職次子家純  
孫聲蕃弟康祿候補道普安新城賊叛殉焉 詔賜  
諡壯節公幼貧失學及爲將始讀書明大義通鑑中  
兵事之要者多能舉之平生敬禮賢士陶君森甲有  
文行多智能爲運籌帷幄每奇中又篤于故舊永固  
協鎮謝永祜早爲李忠武營官公爲哨弁及公爲甘  
肅提督以舊屬禮接見永祜待遇有加人尤多公謙  
厚云

卷四

十

評曰公平苗之功與席少保相頡頏偁爲黔楚良將  
信不誣矣公初爲駱文忠所識拔膽烈過人樸勇邁  
眾至功成名立不矜不伐君子由是益信駱文忠之  
知人焉

中興將帥別傳續編卷五

長洲朱孔彰撰

劉忠誠公坤一

劉公坤一字峴莊湖南新甯人以諸生起家軍旅當道光咸豐之間湘粵之交羣盜如毛新甯土匪李沅發糾黨陷城戕官公與劉武慎公長佑赴寶慶府請兵收復縣城江忠烈公忠源嘗奇其才欲招致軍中以公事父至孝親老不忍遠離而止咸豐五年丁父憂聞粵逆逼近縣治攜家遠避適劉武慎率勇由東安縣回援新甯函招入營公爲武慎族叔年少于武

卷五

一

慎久師事之故聞召卽至馳約各團刻期同進敗賊于楊溪邨是爲公立功之始明年湖南巡撫駱秉章檄公募勇五百人隨同劉武慎馳援江西甫抵萍鄉卽以生力軍攻克蘆溪司要隘進規袁州府偵知僞侍衛李能通在賊中最久能得衆心公遂募購內線招令出降推誠待之與李能通盛服並騎繞城大呼其黨降者晝夜不絕僞檢點張逆等宵遯遂收復袁郡論者謂援江之役以袁州爲最要門戶袁州失則毘連之臨江吉安瑞州各郡皆震公出奇制勝迅復

堅城厥功甚偉七年率楚軍前鋒由分宜新喻直趨  
臨江抵太平墟賊勢方熾遂至羅坊與湘軍及江西  
水師合圍臨江府城僞翼王石達開率悍黨數萬來  
援公與劉武慎定計趁賊未集三路進擊賊眾驚潰  
渡河溺死者無算城中之賊大亂潰圍遠遁遂克府  
城八年駱公秉章以劉武慎請假回湘檄公代統其  
軍進攻撫州軍次秋溪賊於上游龍古渡夾河爲營  
公慮賊堅守撫州之賊出而夾擊我軍腹背受敵遂  
簡銳卒三千乘夜疾進出賊不意踏平各壘又以湘

卷五

二

營被圍于上頓渡復調二千人往援擊破之賊遁走  
福建收復撫州乘勝攻克建昌江西全境肅清九年  
僞翼王石達開率大股賊號百萬出江粵之間犯湖  
南公在籍招募新楚義安勇二千屯衡州之龍海塘  
遏賊來路至永州遇賊前隊擊之大捷移駐祁陽赴  
援寶慶力解城圍隨同劉武慎追賊至廣西桂林克  
復柳州府城由知府擢道員明年劉武慎奏調至粵  
委赴東泉接統各軍時東南各省軍事甚棘粵西僻  
處邊隅餉糈異常支絀公威惠兼施軍容頓壯各賊

匪相繼乞撫並收斬屢降屢叛者數人上游一帶次第平定十一年進攻潯州艇匪冒死上竄又陸匪數千輔之勢極披猖我軍船礮皆小公親赴江干督戰奮勇直前羣賊奪氣斃匪甚多首逆就獲泝流而上克復潯州府城布置略定遽聞石達開將由粵黔交界以竄川楚急率所部馳回柳州扼要邀截行近融縣賊隊已至石逆以我軍守險併命來爭公親率勁騎橫擊之血戰竟日賊乃潰退斬僞官十餘人搜出僞印甚多積功以按察使記名 賞給碩勇巴圖魯

卷五

三

名號旋授廣東按察使同治元年升廣西布政使奉旨飭令迅速赴潯州辦理軍務與僞平潯王黃鼎鳳迭次鏖戰獲勝黃逆退歸天平寨公分兵收復橫州諸境悉平復用奇計攻取覃塘堅壘黃逆窮蹙出降磔之賊黨皆伏誅粵西藏垢匿瑕之地窮凶極惡之徒至此蕩滌殆盡黃鼎鳳憑險負固二十餘年勞文毅崇光在粵最久深以爲憂公竭兩年之力攻克堅巢巨憝授首粵西士民至今感頌四年補授江西巡撫首劾貪劣守令十餘員每接見僚屬必舉作秀

才時所見州縣衙門積弊懇切告誡刊發佐治各書  
令其置諸座右朝夕省覽裁汰各項陋規籌給瘠缺  
津貼以養其廉吏治蒸蒸日上曾文正公稱公居心  
公正辦事精明見之奏牘又以江西軍興後餉項報  
銷四千餘萬各州縣交代積壓九百餘起輾轉膠轕  
流弊滋多公設局澈底清查嚴劾虧空之員並議裁  
各處門釐酌減坐賈釐金民困以蘇餘如修圩隄興  
水利辦積穀設粥廠添築貢院號舍百廢具舉復以  
江省徵收丁漕向有畫一章程言者欲改定銀數如

卷五

四

有不敷月准加收公慮有包庇侵漁之弊詳切陳奏  
力持前議得旨允行江省至今循守公撫江西十  
年休養生澄清吏道一時翕然稱頌十三年調署  
兩江總督士民不忍公去多有依戀感泣者光緒元  
年補授兩廣總督粵省官場積習過深營務亦多廢  
弛公到任後嚴加甄別參劾文武七十餘員並以釐  
務爲叢弊之藪嚴參數員官方肅然嗣兼署粵海關  
監督卸篆後餘銀二十餘萬兩奏明以十五萬兩解  
交藩庫優詔嘉獎餘款悉以助振修隄及各項善

舉之用未嘗一錢入己五年調任兩江是年秋琉球因日本侵併遣使求救議者請三面出舟師東征公以爲未可輕舉疏陳利害援據古今其議遂止七年開缺回籍十六年復起爲兩江總督明年春履任時蕪湖等處匪眾焚燒教堂沿江騷動一夕數驚各國議調兵艦入江勢甚岌岌公相機因應調撥兵隊分往保護緝獲首要各犯立置重典旬日之間民情大定教案亦得從容議結十數年來籌辦江防沿江礮臺後膛者多雜式舊礮間有較新大礮則仍係前膛

卷五

五

不能適用公令上海製造局仿造英國大鋼礮及快礮多尊拗造吳淞口附近獅子林礮臺皆設新造大礮其餘江陰等處各臺亦量爲添設沿江礮臺有新造後膛大礮自公始二十年中東事起奉命赴山海關督師與日兵相持半載敬慎不敗而忠愛之忱尤見於阻和議三電奏略云臣於新令條約雖未深悉要之讓地賠款兩條目前固難以允行後患尤不堪設想宜戰不宜和利害輕重事理顯然此固天下所共知亦在聖明所洞鑒惟一經決裂日人必分

擾猛攻自以保京畿固遼瀋爲第一要義查遼瀋等軍依克唐阿長順陳湜等軍皆與日屢戰甚爲得力唐仁廉亦係宿將所部槍械已齊當足以資抵禦更有宋慶魏光燾李光久諸軍駐紮甯錦一帶該將領等忠勇過人屢當大敵相機戰守似遼瀋後路可無他虞日人如圖犯京畿則自關至京沿海要口處處設防又有各大枝游擊之師日人縱能登岸究屬孤軍既有董福祥程文炳兩軍堵禦於前而津榆皆有重兵可以兩面夾擊卽不得手可以一戰再戰以期

卷五

六

必勝未必彼則長驅直入我卽一蹶不振萬一京畿喫緊臣必抽動勁旅迅速入衛以保無虞前電所云戰而不勝當可設法撐持者此也夫利鈍本難逆睹但日人遠來主客之形彼勞我逸近得探報日新軍多以老弱充數餉亦不繼在我只須堅忍苦戰否則高壘深溝嚴爲守禦日人懸師遠門何能久留力盡勢窮彼將自爲轉圜之計況用兵兩年需餉不過數千萬較賠款尙不及三分之一持久二字實爲現在制日要著諸將一聞和約義憤填胸拚命決一死戰

臣職在戎兵宗社所關惟以殫竭血誠力任戰事斷不敢愛惜生命上負國恩此外則非所敢知昨馳抵唐山與王文韶聶士成丁槐等面商意見相同謹據實直陳明年四月十一日晚又電奏云和戰大局宗社所關朝廷當爲早權至計臣前兩次電奏已罄愚忱何庸再瀆惟近日外閒傳聞謂和局業經批准不日派員赴煙臺換約又得各處電報據俄法德三國電阻日人割地條約日人未見允許各國屢聯致決絕之書又稱日兵艦多梭開出廣島俄國決意開戰又稱伊藤甚急催中國先行換約有事再商等語以上各節臣無從深悉亦未敢遽信如果屬實是日已處極危之勢而我已有可乘之機各國羣起而攻以日兵力餉需已苦難支方且自顧不遑何能攻我在我只展期換約觀釁而動則目前之地步稍紓已可亟圖補救且約卽批准彼此未經互換行止仍由我主持當各國紛起環攻我展轉與之展期極力磋磨彼何敢遽然決裂若一經換約卽係定局縱各國攻取約內之地恐仍非中國所有日人卽許以後

再商已落後著與其挽回於事後曷若堅定於目前  
關繫非輕事機難得天下大較爭此關頭況中國一  
與交鋒日人自力難兼顧關津防務較鬆即可抽調  
關內勁旅會合關外諸軍迅速分路猛攻收復遼東  
失地揣情度勢此尤機會之不可失者日島國耳今  
日已成虎狼又與我最爲逼處若得遼臺爲附兩翼  
中國必有噬臍之禍遼臺與日本國聯成一氣日益  
強盛將來卽求援西洋各大國亦無能制其死命若  
此次和議定約一任日爲所欲爲貽患無窮何堪設

卷五

八

想現在如何消息出使許大臣想已密電陳奏在王  
大臣熟思審處必有微權臣昕夕焦思不敢不據實  
上陳是否有當伏候 聖裁會沿海風災天津營壘  
多壞和議遂定公仍回兩江本任二十四年冬渦陽  
土匪滋事聚集二萬餘人縣城被圍是處爲撚匪老  
巢一經分竄將有燎原之禍公遣湘軍會安徽河南  
軍進剿一鼓盪平奉 旨優敘二十六年近畿拳匪  
之變公維持東南大局苦心孤詣堅定不搖 優詔  
褒嘉是年七月有票匪在長江裕溪口張貼僞示煽

惑愚民句結會匪搶去礮船軍裝藥彈竄擾大通毀劫鹽局釐局遠近震動公迅派開濟兵輪載衛字營勇駛往會合安徽防營勦辦彈壓匪黨逆謀因之不得遽逞人心大安厥後力爭東三省條約會商各國商約皆能統籌國家利害極力堅持有裨大局二十七年九月終于位春秋七十有二公天性忠摯器量寬宏歷官封圻幾四十年吏事最爲老練見事最爲敏速平日接下以和撫民以惠不爲棱角峭厲之行每遇有危疑明決應機不爲眾論所淆惑古人所稱

卷五

九

能斷大事洵無媿色其辦理外交開誠布公和平而又堅定十年以來上海地方屢有橫生枝節皆以鎮靜堅持處之絕不爲所搖動久之卒就帖服近年力保長江之約各國尤所佩服身歿之日各國領事兵官先後來甯弔奠送殯並下旗誌悼江南士民於此舉尤爲感頌不忘後任張公之洞臚陳生平居官事蹟請 宣付史館 詔加恩追封一等男爵晉贈太傅 賞銀三千兩治喪 賜祭一壇 予諡忠誠入祀京師賢良祠並各省建立專祠嗣子能紀官道員

評曰劉公曉暢戎機又長於吏事故任封疆數十年  
軍民悅服究其生平學力多資於劉武慎有本有原  
而因應咸宜至晚值時艱能持大體容保無疆古大  
臣以安社稷爲悅者其公之謂歟

卷五

十

中興將帥別傳續編卷六上

長洲朱孔彰撰

宋忠勤公慶

宋公慶字祝三山東蓬萊縣人公起家寒微咸豐初  
粵撚孔熾安慶旣陷以廬州爲行省公從登州鎮兵  
至廬州會鄉人宮國勳奉檄知亳州公給事官廨後  
從軍立戰功官至總兵過亳州公謙抑不敢與宮抗  
禮乃書謁稱門下初帶三百人有勇有謀收撫撚首  
孫之友等編爲奇勝營大臣袁公甲三河南巡撫英  
桂公皆稱其能安徽按察使張學醵尤重公以所統

卷六上

一

得勝營請袁公屬公接帶五年大股撚匪攻亳州力  
戰解圍始擢千總 賞戴藍翎六年九月帶所部三  
百人與陝甘兵五百人會守宿州丁縣集張落刑龔  
瞎子撚眾圍攻三日夜公奮勇衝殺賊敗遁奪獲軍  
械無算又奪回毫東兩河口民寨擊退黑旂撚匪袁  
公旋奉 詔入都河南巡撫瑛棨公調赴河南助勦  
積功保花翎游擊七年袁公以漕運總督爲 欽差  
大臣督辦安徽全省軍務駐臨淮復調公赴皖八月  
髮逆僞英王陳玉成糾合張落刑龔瞎子撚眾十餘

萬圍攻鳳陽府縣二城公會處州鎮總兵陳國瑞各選精銳數千人夜襲賊營賊驚潰解圍遁十一年苗沛霖叛派公帶隊疏通徐泗後路攻奪卓圩黑劉圩湖溝等處賊圩數十處臨淮大營始得保固先後數百戰積功奉 旨以總兵記名簡放 賞毅勇巴圖魯名號同治元年秋袁公甲三請疾去前敵各營令公與九江鎮總兵朱淮森接統署安徽巡撫唐公訓方接辦軍務裁臨淮舊軍以公分統毅字三營是爲毅軍之始唐公初至素聞臨淮乏餉隊伍不整及閱

卷六上

二

公所部驚曰人言曷足信此隊奚異楚軍有過之無不及也營務處吳兵備大廷兩次夜入公營暗查刁斗森嚴謂公曰吾信君矣由是唐公益重之三年苗沛霖復叛眾數十萬圍攻蒙城十月之久城中糧盡有紳士李南華者善戰守苗眾屢次登城皆擊殺之夜遣壯士縋城以繩繫賊尸入烹食之明日城外無一尸苗大駭不敢逼攻於是官軍用大圍圍之陳總兵國瑞猛攻令公斷其糧道會忠親王僧格林沁由東省馳至督戰發開花礮數十賊夜潰苗沛霖死亂

軍中蒙城圍始解餘黨尙眾僧忠親王飭公往撫一  
日夜馳二百餘里由苗老寨至下蔡其酋率千人出  
迎尙復傲慢立誅之恩威並用均歸順壽州正陽關  
亦迎刃而解逆酋李萬春朱萬隆及逆姪苗景開皆  
捕送邸營伏誅兩淮平維時豫省盜賊充斥張公之  
萬撫豫咨調公再入豫是爲豫軍之始髮撚會合盤  
踞嵩縣山中撚首張總愚等黨眾數十萬蔓延數百  
里張公之萬駐汝州張公曜爲翼長率各軍在嵩公  
喘息未定卽赴嵩晤張公曜詳詢地勢賊情張公曜

卷六上

三

曰諸將來見無詢及此者君來豫之福也訂交極歡  
爰會勦陶灣復追至馬山口賊勢不支竄入楚畱會  
粵匪僞扶王陳得才等擁眾十餘萬闖入英山僧邸  
大兵亦至公會合陳總兵國瑞各率壯勇焚燬木城  
數十里擒斬梟將多名賊計窮勢蹙陳得才縊死山  
谷餘眾悉降四年補授南陽鎮總兵賊竄山東僧邸  
檄公及張曜兩軍勿出境以杜回竄會僧邸戰歿曹  
州賊勢愈熾公被困於鄧州刁河店三日無壘可守  
無糧可因令裨將馬三元率壯士三百潛出收集尾

隊步步前紮以通糧路軍士氣倍無不以一當百賊乃解圍遁張總愚旋復在鄭州挖決黃河三十餘處意圖北竄公追及據隄痛擊泣禱水神廟忽南風大作水勢北趨河岸乾涸率眾力戰張逆西趨秦任賴各股復入豫連擊之亦南竄楚豫境略平時湘軍將劉松山亦在河南助剿曾文正公喜曰二君以戰事相勉推功讓能得師克在和之道河南巡撫李公鶴年奏賊無宿糧不卽殄滅者賊騎我步以步當騎走不相及滅賊之計非合圍不能剿賊蹤延蔓三百州

卷六上

四

邑因險合圍固非一省兵力所可辦第爲剿則必勝計豫軍多潁亳人與賊相習其長技亦略同宜若可用因添練兩大軍曰毅軍曰嵩武軍各萬餘人察豫省宿將無如南陽鎮總兵宋慶前布政使改用總兵張曜者請起張曜于家與公各領一軍由是豫軍良將宋張齊名六年會合銘盛嵩武等軍扼守黃河驅任賴等股於東境以次削平蒙恩賞穿黃馬褂換格洪額巴圖魯勇號西撻張總愚由山西吉州渡冰橋直犯畿輔公率軍倍道繞出賊前大小百餘戰至

七年六月驅賊於齊河玉林鎮會合湘淮各軍聚而殲旃得力處尤在公饒陽一戰擊斃悍目張五黑賊膽遂寒李公鴻章上其功特賞二等輕車都尉世職補授湖南提督東撚西撚旣平西回方燾公奉命會合張曜軍馳赴秦晉相機防剿八年正月馳抵神木縣當回匪屠城之後屍積如山城空無人煙埋蒿掩骼招集流亡撫卹未畢邊寇遽至一戰於紅柳樹再戰於鹽池葛綦店斬馘無算回匪憚公聲威不敢復出擾榆邊始安方各軍之初入晉也時值隆冬

卷六上

五

代北嚴寒積雪沒脛堅冰在鬚各營官不恤兵艱以致紛紛譁潰嵩武軍潰於偏關果字營潰於隴西老湘營潰於綏德已踞州城居民逃竄分統毅前營劉提督廷聞報派隊西渡大張旂幟叛軍怵服不敢動會湘軍將劉提督松山馳抵州斬倡亂者十數人而事定九年劉提督松山陳隕金積堡將軍金順與張曜會辦甯夏軍務糧道阻隔岌岌不支公令劉提督廷率隊往援收復河西三縣攻破王家疇納家閘洪岡賊寨又令提督馬三元蔣東才搜剿鄂爾多師餘

匪七戰七捷後路疏通甯夏金積堡各軍遂得假手  
成功十一年西甯肅州均告急左文襄公宗棠調赴  
甘肅助剿六月奪取肅州東關晝夜環攻城內饑困  
八月文襄親臨視師賊懼乞降游移反復因而克之  
關內肅清 特賞雙眼花翎 欽差會辦哈密匪  
事宜公受寵若驚自籌糧運先派兩營前往哈密屯  
田旋調四川提督皆在軍遙領十三年冬河狄撫回  
閔殿臣復叛楚軍失利時公駐軍涼州文襄飛檄徵  
調三日馳五百餘里時人僞爲飛隊軍抵沙泥站回

卷六上

六

眾大驚縛獻首逆餘黨悉散光緒元年以中原腹地  
空虛奉 旨振旅東還河南議裁兵節餉酌留馬步  
九營時值晉豫奇荒道殣相望亂民胡豹子聚眾謀  
不軌公勦撫兼施地方以安六年奉 命會辦奉天  
防務八年移防旅順適法人構釁窺我有備夷艘無  
北犯者十餘年來軍容稱盛醕賢親王奉  
懿旨巡閱歎爲諸軍之冠親解袍服賜之

皇上二旬萬壽蒙 特恩賞加太子少保銜入 覲  
賞紫禁城騎馬二十年

皇太后六旬萬壽慶典 特恩賞加尙書銜是年秋  
中日失和先派馬提督三元赴朝鮮助剿捷於平壤  
公復奉 命幫辦軍務便宜行事 諭飭添募三十  
營並令先就現有之軍馳赴沿邊辦理軍務維時僅  
有馬步隊三營及宋提督得勝新招二營倉皇赴敵  
諸將佐束手無策公到後軍心始定敵兵已過義州  
撲犯九連城公親率馬宋兩分統首先撲過愛河眾  
勇繼之衣履盡濕猝與敵遇自卯至午鏖戰三時之  
久三面受敵一無接應猶復激勵將士勉以大義力

卷六上

七

圖恢復欽奉 朝命南援金旅未至旅順已失陷是  
時新軍亦成數營復收集殘卒一戰於感王寨再戰  
於太平山田莊台公立馬督戰奮不顧身馬中礮斃  
三易馬不稍卻先後殺敵無算嗣皖豫所招之營陸  
續成軍戰事略有把握忽以議款停戰冬十二月蓋  
平縣失陷自請從重治罪 詔予薄譴降二級留任  
明年二月營口田莊台相繼失守復請從重治罪部  
議再降二級調用 加恩改爲革職留任是年冬日  
本交還金旅奉 命前往駐守二十四年遵 旨移

防山海關公先患風痺九月於錦州途次奏請 予  
假調理 恩賞人參活絡丹冬十一月入 覲奉  
懿旨開復處分 賞西苑門內騎馬乘坐船隻挖牀  
二十五年夏舊疾復作具摺請假再 賞人參冬八  
旬 賜壽

皇太后賞耆年偉略匾額 御筆畫屏四幅福壽字  
無量壽佛如意他珍物稱是

皇上賞樹績維祺匾額餘珍與

太后所賜同二十六年

卷六上

八

皇上三旬萬壽恩賞鸞珥集瑞匾額蟒袍料夏五月  
猝邁拳匪之亂俄法英美德日聯軍虜至奉 命幫  
辦北洋軍務自念年力衰邁恐誤軍機奏准以馬提  
督三元接統所部各軍公指授機宜不分畛域馬提  
督率軍力戰連得大捷敵人死亡數千我軍勁卒亦  
傷亡過半時直隸提督聶士成前山東巡撫李公秉  
衡已先陣亡眾寡不敵軍無後繼敵氛進逼京師  
聖駕西巡公以兩次督師孤忠力竭抱恨無窮由是  
疾病纏綿明年和議成扶疾至汴恭迎

聖駕還宮未幾病歿年八十有三事聞 朝廷震悼  
晉封三等男爵詔建祠立傳 子諡忠勤子天傑  
賞五品京堂孫裕繼 賞知府公從戎五十年未嘗  
一日安處每止屯獨坐樹下目驗兵卒皆安舍然後  
入帳中與賓僚議事文報無遺漏而後安煦育士卒  
如家人父子體卹備至然有動民間一草一木者殺  
無赦故所至兵民感戴眾口同聲每戰士卒奪獲騾  
馬必收買交公直紳耆散與鄉民先後不下數萬蓋  
賊多掠鄉間牲畜恐耕種失時亦防隊內馬多或亂

卷六上

九

陳也公用心精細多如此每日必接見分統營哨官  
操場校閱必親到士卒最下者亦使之盡言嘗曰帶  
兵以訓爲先時時勉以大義俾知親上死長心愈固  
則氣愈壯知乎此則用兵之道思過半矣湘鄉曾文  
正公湘陰左文襄公合肥李文忠公皆重公無異湘  
淮名將二十一年與日本款成 廷議湘淮豫各留  
三十營公總統豫軍 賜名武衛左軍麾下良將如  
劉廷蔣東才李承先宋得勝程允和姜桂題郭殿邦  
皆有名馬提督三元尤爲傑出輕財好士有古名將

之風皆公選拔子行陳者公廉俸所入分潤親黨晚年好讀資治通鑑能通其大意尤好呂新吾呻吟語能作擘窠大字氣勢道勁人皆寶貴云

評曰自

兩宮西狩忠勤卽憤鬱成疾津沽聯軍何異以鄒敵楚猶能數戰決勝支持危局可謂難矣甲午之役忠勤猶言朗齋張勤果公曜字慶雲陳總兵國瑞字若在我必能假手成功豈虛語哉

卷六上

中興將相別傳續編卷六下 長洲朱孔彰撰

馮少保子材別傳

馮少保子材字翠亭廣東欽州人咸豐初粵西土匪起聚徒于博白縣爲眾所推有數千人後率黨歸順從向忠武公榮征戰有功擢副將七年隸江南大營從張公國樑攻鎮江鏖戰六晝夜克之八年五月金陵城賊出太平神策門犯大營公與張玉良等陷陳擊賊于城外奪其大旗賊敗走自龍膊子至莫愁湖尸相藉遂攻金川門毀城東北柵壘略盡十月克溧

卷六下

水擢總兵十年閏三月江南大營潰賊以全力陷蘇常官軍僅保上海一隅江蘇全省淪沒金陵無圍師二年公以三千人獨堅守鎮江屢挫賊鋒賊來攻嘗開城門出戰軍士無不以一當百幸糧路未斷頗與揚州舟師聯絡而餉項月三萬則仰給于滬關李公鴻章源源解濟故能戰能守保全孤城至同治三年四月曾軍已合圍金陵蘇軍已克常州公攻克丹陽朝廷以守鎮江助克金陵功 授廣西提督 賞給騎都尉調雲南提督及李揚才之亂越南王來請

兵公督師出鎮南關討平之光緒十年法人爭越南與中國肇釁先是廣西巡撫徐延旭調兵防邊敗于越南潘鼎新代之又挫於諒山公暨總兵王孝祺軍自廣東來援先後抵龍州孝祺軍甫出關而諒山防兵已潰公親率一營先至南關廣西巡撫令公統十營回駐關外東路及聞警復西援法兵已入鎮南關鼎新軍統將楊玉科戰歿總兵董履高受重傷諸軍多潰十一年正月十一日法兵焚關退翌日公至南關建議於關內十里之關前隘跨東西兩嶺閒督所

卷六下

二

部築長牆三里餘外掘深塹爲扼守計營於嶺半令王孝祺軍屯于後半里許爲犄角當是時蘇元春陳嘉軍屯幕府在關前隘後五里蔣宗漢方友升軍屯憑祥在幕府後三十里潘鼎新軍屯海邨在幕府後六十里魏綱軍屯艾瓦防芄封在關西百里王德榜軍屯油隘防入關旁路在關外東三十里獨公一軍當中路前敵得越南人密報法兵將出扣波襲芄封攻牧馬繞出南關以北欲斷唐景松馬盛治兩軍歸路公遣五營扼扣波以待法兵至公突出奮擊獲其

馱軍火大象一擒匪黨二法兵敗退復來爭再擊卻之乃率王孝祺軍出關襲敵破其二壘法兵多死敗走二月朔法人悉起諒山之眾并力入關直撲關前隘長牆公告諸將曰法兵再入關有何面目見粵民何以生爲諸將皆憤甚誓與長牆俱死法以開花礮隊循東西兩嶺進向下轟擊以槍隊撲中路法謂越南人皆公軍內應自以眞法兵居前黑兵次之西貢洋匪又次之教匪客匪在後礮聲震天遠聞七八十里山谷皆鳴槍彈積陳前厚者至寸許我軍死戰傷

卷六下

三

亡殊多王孝祺自率小隊攻東嶺敵稍卻蘇元春援軍至合力拒戰諸軍傳餐夜未收隊王德榜自油隘出軍夾擊法糧械遂不得入關是月八日清晨復大戰法兵來益眾礮益密公拒中路蘇元春助之王孝祺當右陳嘉蔣宗漢當左左路卽東嶺法礮最猛公與諸統領約有退者無論何將遇何軍皆誅之復於各路設卡截殺逃者公與王孝祺各刃退卒數十人敵勢狂悍致死已薄長牆或已越入公年近七旬短衣草履持矛大呼躍出長牆率二子相榮相華搏戰

將士開柵門湧出諸軍見公如此無不感奮關外游  
勇客民千餘聞公親出陳皆來助戰王孝祺部將潘  
瀛率壯士袒臂裸體衝入敵陳蔣宗漢陳嘉爭東嶺  
嘉受傷不退王孝祺奪西嶺鈔敵後與陳嘉等合擊  
是日王德榜擊法援兵于甫谷亦自關外夾擊東嶺  
語具王布政傳于是法兵塵戰兩日彈礮已盡後隊  
軍火又被截惶悵無措頃刻聞礮聲頓息遂大奔我  
軍追殺法兵翻巖越澗而竄有法國王子在兵隊中  
習戰亦逃死旬日後有樵人入山見深谷中餓死法

卷六下

四

人數十此役計殺真法兵黑兵千餘法酋數十客匪  
教匪數百公遂率大軍出關浹辰之間克文淵州克  
巴平克驅驢墟克諒山獲法人軍械糧米皆納之官  
軍無私焉又與諸軍分兵追剿克谷松克觀音橋克

屯梅

卽長慶府

克拉木攻耶甲

卽諒江府

王孝祺進軍貴門關

共斬法酋數十斬法兵無算盡復去年官軍所駐邊  
境又率全軍進規北甯適奉停戰撤兵之旨乃止  
最公三次出關討平越亂恩威並著越南軍民聞公  
至若得慈父母凡關外越人受法匪游勇之害者關

丙民人受各軍騷擾之害者咸來赴訴公亦視若子弟惻然矜憫爲之撫卹示禁告戒諸軍越官越民爭爲耳目敵人舉動悉來報知近自北甯遠至西貢皆通消息公軍出關後扶老攜幼箠食壺漿來相犒問願供辦資糧嚮導先驅助官軍勦除法人長爲天朝赤子公亦毅然自任致書兩廣總督張公之洞督辦廣東軍務彭公玉麟請奏謂若假以事權期一年肅清全越由此觀之機會誠可惜也法人受大創卽詣北洋大臣議和罷兵 朝廷論功晉太子少保十

卷六下

五

九年

皇太后萬壽慶典加尙書銜明年中東肇衅官軍挫於平壤 詔公率軍北援駐江南鎮江待調遣和約成仍回廣東欽州防邊二十九年廣西土匪勢熾

命公往勦甫募練成軍公子相榮相華率以進公病劇秋七月卒于軍年八十有六兩廣總督岑春煊奏聞 賜卹有加公子相榮相華官知府餘子孫十餘

人

評曰馮公佐平洪寇保全潤州可與張忠武齊名矣

其後三次出鎮南關先平越裳之亂遠人已懷德畏  
威又破佛郎機之強敵 天威遠揚使遂公之志肅  
清南裔立銅柱爲界其勳業不當與漢伏波後先輝  
映哉

